

Soraarninngornikut pisortat ingerlataannik angalatitsiviit aqutugalugit akikinnerusumik angalasinnaanerat ukioq naallugu atuutilernissaa aammalu soraarninngornikunut billetsit ukioq naallugu killeqanngitsumik pisiassaasinnaanerat aningaasatigut qanoq naleqassanersoq Naalakkersuisut misissuinissaannik Inatsisartut aalajangiiffigisassatut siunnersuut. Misissuineq soraarninngornikut akikinnermik angalasarnerannut malittarisassat allanngortinnissaannik tunngaviliissaaq, kingusinnerpaammilu UPA2025-mi inatsisartunut saqqummiunneqassalluni.
Inatsisartunut ilaasortamit Jens Napātōk', Naleraq, saqqummiunneqarpoq

pillugu

Sanaartornermut Ataatsimiititaliap

siunnersuutip aappassaaneerpeqarneranut

ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Juliane Enoksen, Inuit Ataqatigiit, siulittaasoq
Inatsisartunut ilaasortaq Jens Napātōk', Naleraq, siulittaasup tullia
Inatsisartunut ilaasortaq Adam Kristensen, Inuit Ataqatigiit
Inatsisartunut ilaasortaq Jens Kristian Therkelsen, Siumut
Inatsisartunut ilaasortaq Lars Poulsen, Siumut

Ataatsimiititaliap UKA2024-mi 17. oktober siullermeerinninnerup kingorna siunnersuut misissuataarpaa.

Siunnersuutip imarisai siunertaalu

Siunnersuutip siunertaraa soraarnerussutisiallit angalasut, angalatitseqatigiiffiit pisortanit pigineqartut soorlu Air Greenland aamma Arctic Umiaq Line aqutugalugit angalagaangata, ukioq naallugu soraarnerussutisialittut akikillisaavigineqarsinnaanerata aningaasatigut kingunerisassaanik Naalakkersuisut misissuissasut.

Kalaallit Nunaanni angalanermut aningaasartuutit qaffasissorujussuit utoqqarnut soraarnerussutisialinnut artorsaataasut millisinneqarnissaannik kissaateqarneq aallaavigalugu siunnersuut saqqummiunneqarpoq.

Siunnersuutip Inatsisartuni siullermeerneqarnera

Siunnersuutip siullermeerneqarnerani siunnersuut ilalerneqarluarpoq. Partiit tamarmik nassuerutigaaq nunatta iluani angalaniarneq akisuujusoq, oqaatigineqarlunilu Nuummi, Ilulissani Qaqortumilu mittarfiit nutaat naammassineqariarpata angallannikkut aaqqissuussaaneq nutaaq takkukkumaartoq.

Immikkoortup siullermeerneqarnerani siusinaartumik soraarnerussutisiallit soraarninngornikullu siusinnerusukkut ukioq kaajallallugu akikillisaavigineqartarsimanerat ilanngullugu tikinneqarppoq. Inuiaqatigiinni immikkoortut taakku ukioq kaajallallugu akikillisaavigineqarsinnaasariaqarnerat siunertamullu tamatumunnga billettit amerlassusiisa killeqartariaqannginnerat siunnersuuteqartup kissaatigalugu saqqummiuppaa.

Naalakkersuisut allannguutissatut siunnersuuteqarput imatut oqaasertalimmik:

"Soraarnerussutisiallit aamma siusinaartumik sulisinnaajunnaarnerisutillit ukioq kaajallallugu 50%-inik akikillisaanneqartalerpata, tamanna qanoq akeqassanersoq, kiisalu bilitsit akikillisaatillit killeqanngitsumik amerlassusilerneqarnissaannut misissuinissamut Naalakkersuisut peqquneqarnissaannut Inatsisartut aalajangiiffigisassaattut siunnersuut. Tamatumani soraarnerussutisialinnut akikillisaasiisarnermut maleruagassap allanngortinneqarnissaa, taamaalillunilu ukioq kaajallallugu atuuttussanngortinneqarnissaa, aammalu amerlassutsit killeqarunnaarnissaat siunnerfigineqassaaq. Misissuineq soraarnerussutisialinnut maleruagassanik allannguinnissamut tunngaviliissaaq, aammalu kingusinnerpaamik UPA2025-mi Inatsisartunut saqqummiunneqassalluni."

Oqallinnerit tunngavigalugit siunnersuut ataatsimiititaliamut suliarineqartussanngortinneqarpoq.

Siunnersuutip aningaasatigut kingunerisassai

Inatsisartut Suleriaasianni § 33, imm. 1-imi aalajangersarneqarpoq aalajangiiffigisassatut siunnersuutip timitalerneqarnerata aningaasatigut allaffissornikkullu kingunerisassai siunnersuummut tunngavilersuutini allaaserineqarsimassasut.

Ataatsimiititaliap maluginiarpaa tamanna naapertorlugu siunnersuutip timitalerneqarnerata aningaasatigut kingunerisassai siunnersuummi oqaatigineqarmata. Taamaalilluni misissuinerup aningaasatigut kingunerisassaasa ilinniagartuutut fuldmægtigip ukiumut akissarsiaasa affaanit 250.000 kr.-inut naapertuuttunit amerlanerunnginnissaat naatsorsuutigineqarpoq.

Ataatsimiititaliap siunnersuummik suliarinninnera


Ataatsimiititaliap maluginiarpaa Naalakkersuisut allannguutissatut siunnersuutaata akuersissutigineqarnera misissuinerup siunertaanik Naalakkersuisut ilaliinerannik

malitseqassasoq, tamatumalu saniatigut misissuinermi qitiutinneqartussat annertusineqassallutik, kiffartuussinissamik isumaqatigiissutit tunngavigalugit angallassisartut tamaasa kiisalu soraarnerussutisialinnut siusinaartumillu soraarnerussutisialinnut billettit amerlassusiisa killeqarunnaarnissaat misissuinermit ilanngunneqartussanngorlugit.


Ataatsimiititaliap inassuteqaatai

- Ataatsimiititaliap isumaqatigiittup Naalakkersuisut allannguutissatut siunnersuutaat akuerineqassasoq inassutigaat

Taamatut oqaaseqaateqarluni isumaliutissiisumilu oqaatigineqartutut paasinnilluni ataatsimiititaliap siunnersuut aappassaaniigassanngortippaa.



Jens Napātók?
Siulittaasup tullia



Jens Kristian Therkelsen

Juliane Enoksen
Siulittaasoq

Adam Kristensen



Lars Poulsen